



官常典第七百九十一卷

政事部名臣列傳二十一

宋八 王居卿

按宋史本傳居卿字壽朋登州蓬萊人以進士至知齊州提舉夔路京東調發防秋兵資糧不滿望轉百貨市塞上者聽以家貲抵於官爲給長券至賣所併輸征稅直公私桷奏帥臣自斃桷詭從其運使青州河貫城中苦泛溢爲病居卿卽城立飛梁上設樓櫓下建門以時閉啟人誦其智徙河北路河決曹村居卿立軟橫二埽以遏怒流而不與水爭朝廷賞其功建以爲都水法召拜戶部副使提舉市易擢天章閣待制河北都轉運使知秦州太原府卒年六十二居卿俗吏特以言利至從官

陳桷

按宋史本傳桷字李壬温州平陽人以上舍貢辟雍政和二年廷對第三授文林郎冀州兵曹參軍累遷尙書虞部員外郎政和七年提點福建路刑獄福州調發防秋兵資糧不滿望殺帥臣變生倉卒吏民奔潰闔城震駭桷入亂兵中諭以禍福賊氣沮邀桷奏帥臣自斃桷詭從其請間道馳奏以

前奏不實待罪朝廷以桷知變釋之叛兵既調行迺道追殺首惡二十餘人一方以安建炎四年五月復除福建路提刑尋以疾乞祠主管江州太平觀紹興三年召爲金部員外郎升郎中時言事者率毛舉細務略大利害桷抗言今當專講治道之本修政事以攘敵國不當以細故勤聖慮如平時也又言刺史縣令滿天下不能皆得人乞選監司重其權久其任除太常少卿又陳攻守二策在於得人心修軍政五年除直龍圖閣知泉州明年改兩浙西路提刑乞置鄉縣三老以厚風俗凡宮室車馬衣服器械定爲差等重修靡之禁八年遷福建路轉運副使十年復召爲太常少卿適編類徽宗御書成詔藏敷文閣桷以爲舊制自龍圖至徽猷皆設學士待制雜壓著令龍圖在朝請大夫之上至徽猷在承議郎之上每閣相去稍遠議者疑其不倫直敷文閣者綴徽猷則與諸閣小異降之則班列太卑欲參酌取中並爲一列不必相遠庶幾名位有倫仰稱陛下嚴奉祖宗謨訓之意又言祫祭用太牢此祀典之常駐蹕之初未能備禮止用一羊乞檢會紹興六年詔旨復用太牢十一年除權禮部侍郎賜三品服普安郡王出閣奉詔與吏部太常寺討論典故桷等議以國本未立宜厚其禮以繫天下望乃以皇子出閣禮例上之或以爲太重詔以不詳具典故專任己意懷姦附麗與

吏部尚書吳表臣禮部尚書蘇符郎官方雲翼丁仲寧太常屬王普蘇籍並罷等以桷提舉江州太平觀十五年知襄陽府充京西南路安撫使襄漢兵火之餘民物凋瘵桷請於朝以今之戶數視承平時纔二十之一而賦須尙多乞重行蠲減明年金房兵叛桷遣將平之而後以聞漢水決溢漂蕩廬舍躬率兵民捍禦隄岸賴以無虞以疾乞祠除祕閣修撰提舉江州太平興國宮二十四年改知廣州充廣南東路經略安撫使未至而卒年六十四桷寬洪醞藉以誠接物而恬於榮利嘗奏檜用事以永嘉爲寓里士以貢緣攀附者無不躡登顯要桷以立螭之舊爲人主所知出入頓挫晚由奉常少卿擢權小宗伯復以議禮不阿忤意遂罷其節有足稱自號無相居士有文集十六卷子汝楫汝賢汝諧孫峴以詞學擢第官中書舍人直學士院

李璆

按宋史本傳璆字西美汴人登政和進士第調陳州教授入爲國子博士出知房州時旣權官茶復彊民輸舊額貧無所出被繫者數百人璆至卽日盡釋之宣和三年廷議將取燕璆聞之曰百辟卿士一倡共和國家安危其幾在是上疏切諫大略謂太祖以聖武得天下將士皆百戰之餘以是而

取燕雲宜易爲力然趙普輩無敢贊其決者蓋識天下大勢且重民命故也今承太平之業父老幸不識兵雖不得燕雲地何闕於漢疏奏不省及燕旣平責監英州清溪鎮明年赦還爲郎尋試中書舍人建言元祐名臣子孫久被廢錮宜少寬之宦官譚植出師河北以無功廢將復進用璆不肯書行會山東盜起州縣不能制至河北無見糧軍士洶洶璆條奏十事忤大臣意罷紹興四年以集英殿修撰知吉州江西兵素剽悍璆始視事有相挺爲亂者亟捕誅首謀者撫循其餘大布恩信境內遂安累遷徽猷閣直學士四川安撫制置使成都舊城多毀圯璆至首命修築俄水大至民賴以安三江有堰可以下灌眉田百萬頃久廢弗修田萊以荒璆率都刺史合力修復竟受其利眉人感之繪像祠於堰所間遭歲饑民徙發倉振活無慮百萬家治蜀之政多可紀有清溪集二十卷

韓肖胄

按宋史本傳肖胄字似夫祁州安陽人曾祖琦祖忠彥再世爲相父治肖胄以蔭補承務郎歷開封府司錄與府尹同對殿中徽宗問其家世賜同上舍出身除衛尉少卿賜三品服尋假給事中充賀遼國生辰使旣還時治守相州請祠肖胄因乞補外侍疾詔除直祕閣知相州代其父任陞辭帝曰

先帝詔韓氏世官于相卿父子相代榮事也在相四年王師傳燕肖胄策幽薊且有變宜陰爲守備已而金騎入境野無所掠而去建炎二年知江州入爲祠部郎遷左司嘗言中原未復所恃長江之險淮南實爲屏蔽沃野千里近多荒廢若廣修農事則轉餉可省兵食可足自是置局建康行屯田於江淮又應詔陳五事曰遠斥堠戢戍兵防海道援中原修軍政擢工部侍郎時川陝馬綱路通塞不常肖胄請於廣西邑州置司互市諸蕃馬詔行之時召侍從問戰守計肖胄條奏千餘言帝稱其所對事理簡當吏部尙書席益歎曰援古證今切於時用非世官不能也紹興二年詔百官各言省費裕國強兵息民之策肖胄言天下財賦窠名舊悉隸三司今戶部惟有上供之目而已問諸路窠名於戶部戶部不能悉問諸州窠名於漕司漕司不能悉失一窠名則此項遂亡願詔諸路漕司括州縣出納可罷罷之可併併之立爲定籍漕司總諸州戶部總諸路則無失陷矣經費之大莫過養兵今人亡而冒請者衆願立諸軍覆實之法重將帥冒請之罪則兵數得實餉給不虛省費裕國此其大者生民常賦之外迫以軍期吏緣爲姦斂取百端復爲寇所迫逐田桑失時寇去復業未及息肩催科之吏已呼其門矣願詔郡邑招集流散官貸之種俟及三年始責其賦置籍書之以課殿最

強兵息民此其先者時多所采納又請復天地日月星辰社稷之祀於是下有司定一歲祭禮遷吏部侍郎時條例散失吏因爲姦胥立重賞俾各省記編爲條目以次行之舞文之弊始革陣亡補官得占射差遣而在部常調人守待不能注授且有短使重難胥胥請陣亡惟許本家用恩例異姓候經任收使遂無不均且嚴六部出入之禁而請託不行三年拜端明殿學士同僉書樞密院事充通問使以胡松年副之胥胥慨然受命時金酋粘罕專執政方恃兵強持和戰離合之策行人皆危之胥胥入奏曰大臣各徇己見致和戰未有定論然和乃權時之宜他日國家安強軍聲大振誓當雪此讎恥今臣等行或半年不返命必復有謀宜速進兵不可因臣等在彼而緩之也將行母又語之曰汝家世受國恩當受命卽行勿以我老爲念帝稱爲賢母封榮國夫人胥胥至金國金人知其家世甚重之往返纔半年自帝卽位使者凡六七年未嘗報聘至是始遣人偕來胥胥先北使入對與朱勝非議不合力求去以舊職知温州提舉臨安府洞霄宮五年詔問前宰執戰守方略胥胥言女真等軍皆畏服西兵勁銳喜戰今三帥所統多西人吳玠繼有捷奏軍聲益振敵意必搖攻戰之利臣固知之自荆襄至江淮綿亙數千里不若擇文武臣僚按行計度求險阻之地屯兵積糧則形

勢相接今淮東西雖命宣撫使然將屯置司乃在江上所遣偏裨分守不過資以輕兵勢孤力弱難以責其固志當移二將於江北使藩籬可固又言諸大將之兵自主庭戶更相讎疾若欲並遣進攻宜先命總帥分以精銳自成一軍號令旣一則諸將疇敢不聽命畿甸山東關河之民怨金人入骨當以安集流亡私懷歸附爲先今淮南江東西荒田至多若招境上之人授田給糧捐其賦稅必將接跡而至又奏江之南岸曠土甚多沿江大將各分地而屯軍士舊爲農者十之五六擇其非甚精銳者使之力耕農隙則試所習之技藝秋成則均以所種之禾麥或募江北流徙及江南無業願遷之人分給之剗爲營屯止則固守出則攻討起知常州召赴行在提舉萬壽觀尋除僉書樞密院事和議已定復命肖胄爲報謝使接伴者逆於境謂當稱謝恩使肖胄論難三四反遂語塞旣至金遣人就館議事肖胄隨問隨答衆皆聳聽其還給輓車及頓遞宴設自肖胄始除資政殿學士知紹興府尋奉祠與其弟膺胄寓居於越幾十年事母以孝聞弟不至不食所得恩澤皆先給宗族卒年七十六謚元穆琦守相作畫錦堂治作榮歸堂肖胄又作榮事堂三世守鄉郡人以爲榮

李彌大

按宋史李彌遜傳彌遜弟彌大字似矩登崇寧三年進士第以大臣薦召對除校書郎遷監察御史假太常少卿充契丹賀正旦使時傳聞燕民欲歸漢徽宗遣彌大覘之使還奏所聞有二或謂彼主淫刑滅親種類離女真侵迫國勢危殆爲可取或謂下詔罪已擢用耆舊招赦盜賊國尙有人未可取莫若聽其自相攻併遷起居郎試中書舍人同修國史童貫宣撫承興走馬承受白鶚恃貫不報師期朝廷止從薄責大彌繳奏以爲邊報不至非朝廷福鶚坐除名彌大亦出知光州移知鄂州召爲給事中兼校正御前文籍詳定官拜禮部侍郎金人大舉入侵李綱定城守之策命彌大爲參議與綱不合罷未幾除刑部尙書初朝廷許割三鎮畀金人旣而遣种師道師中援河北姚古授河東彌大上疏乞起河東西境麟府諸郡及陝西兵以濟古之師起河東路及京東近郡兵以濟師道師中之師爲腹背攻劫之圖遂除彌大河東宣撫副使張師正領勝捷軍敗於河東潰歸彌大誅之復遣餘卒援定真餘卒叛宣撫罷命彌大知陝州河東破小將李彥先來謁言軍事彌大壯之留爲將戍崞澗間以遏敵詔遣使召援彌大未敢進會承興帥范致虛紕兵勤王檄彌大充諸道計議行至方城道阻乃率衆赴大元帥府建炎元年除知淮寧府到郡未幾杜用等夜叛彌大縋城出賊散

乃還坐貶秩尋詔爲吏部侍郎帝如杭州命權紹興府試戶部尙書兼侍讀呂頤浩視師以彌大爲參謀官彌大奏王導謝安爲都督未嘗離朝廷今邊圉幸無他頤浩不宜輕動又言已爲天子從官非宰相可辟乞於諸軍悉置軍正如漢朝故事以察官郎官爲之陛下必欲留臣當別爲一司伺察頤浩過失忤旨出知平江府中丞沈與求劾彌大謀間君臣妄自尊大奪職歸知靜江府奏廣西邊防利害入爲工部尙書未幾罷去廣西提刑韓璜劾其在靜江日斷強盜死罪引絞入斬貶兩秩紹興十年卒年六十一

柳約

按宋史本傳約字元禮秀州華亭人大觀三年上舍進士試中學官爲霸州教授徙睦州入爲辟雍正遷博士改宣議郎充廣親宅宗子博士約深於經學屬辭粹微大爲學者師慕提舉福建鹽事召對論內外學正次乞罷內外官列堂曰投牒求官以厚風俗授祕書省校書郎進著作佐郎徽州司錄改通判宿州召拜監察御史靖康初兼權殿中侍御史論三鎮不可棄改尙書工部員外進左司員外郎父憂去官服除以直顯謨閣充御營司參謀官遷太常少卿高宗將幸平江約疏言兵可進

毋退以示怯於敵乃以直龍圖閣知台州未赴徙嚴州兼浙西兵馬都監節制管內軍馬當是時金人大入杜充擁眾北去列郡震恐莫有奔問官守者約於橫潰中屹保孤城悉力捍禦境內接堵則慨然上書請糾合諸郡克復吳會上嘉其忠進右文殿修撰守郡如故詔以軍興費出無藝吏慢弗虔柳約獨謹賦輸率先程督進秩一等又詔約郡當兵衝而能不辭難不避事益嚴列柵保綏一方朕甚嘉之其以約充集英殿修撰召入對獎勞再三擢權戶部侍郎約於是感激盡言凡例外宣索皆執奏不進論吳玠等罪未正非所以厲臣節諸大將提兵入覲各名其家將有尾大不掉之患皆人不敢言者又言軍興科需百出望官戶名田過制者與編戶均一科敷請增諸路酒錢其半令提刑司椿管以備軍費皆從之會高麗請修貢議遣使報聘上顧廷臣無出約右加試戶部侍郎充其選且將大用當路忌之諷言者誣以事罷爲提舉太平觀居七年復祕閣修撰金人歸侵疆起知蔡州被命而往一無顧避旣而金人渝平傳檄河南守臣皆舉城降約獨遣使數輩於武昌得報而後返未幾以敷文閣待制食祠祿十有五年卒贈四官約天性至孝母病甚泣禱於天願損壽以益親壽母尋愈約竟先母兩月卒

盧知原 弟法原

按宋史本傳知原字行之湖州德清人以父任知歙縣因近臣薦赴都堂審察累遷梓州路轉運副使時承平既久戒備皆弛知原招補兵籍築城互二十餘里王黼當國費出無藝知原因疏言之黼怒罷去久之起提點京東刑獄改江西轉運副使過闕入奏徽宗勉之曰卿在蜀道功效甚休遂賜三品服先是綱運阻於重江吏卒並緣爲姦知原悉意經理故先諸道上京師進一官尋除直祕閣爲江淮荆浙等路發運使升祕閣修撰提舉河北以言者劾職歸吏部高宗卽位復龍圖閣知温州時葉濃陷建州揚勍陷處州知原繕甲兵增城浚隍聲勢隱然帝東幸知原繇海道轉粟及金繒十餘萬至台州召見稱獎擢右文殿修撰管內安撫使在郡四年民繪像祠之王師討范汝爲召爲添差兩浙轉運使罷提舉太平觀都督孟庾辟爲參謀改徽猷閣待制知臨安府諫官唐輝言知原爲政乖謬詔復爲都督府參謀官章再上遂以舊職奉祠紹興十一年十月卒弟法原字立之自知雍丘縣積官太府少卿賜同上舍出身使遼還遷司農卿賜三品服爲吏部尙書以官秩次第履歷總爲一書功過殿最開卷瞭然更不能欺坐王黼累罷爲顯謨閣待制紹興元年提舉臨安洞霄宮

張浚承制起知夔州尋爲龍圖閣學士川陝等路宣撫處置副使進端明殿學士川陝宣撫副使金人攻關輔叛將史斌陷興州諸郡多應者法原命諸將堅壁言戰者斬衆以爲怯未幾河東經制使王夔以乏食班師法原開關納之與夔同破斌復興州方巨盜充斥秦隴叛兵欲窺蜀法原極意拊循嚴爲備禦傳檄諸路人心稍安視山川險阻分地置將自洮岷至階城關師古主之屯通川文龍至威茂劉錡主之屯巴西前後屢捷上所僭重會兀朮攻關爲吳玠所敗法原素與玠不睦玠因奏功訟法原不濟師不餽糧不銓錄立功將士帝手詔詰問法原自辯甚力上頗不直之憂恚卒於軍始法原爲川陝宣撫使上從容謂知原曰朕方以川陝付法原蓋兄弟皆以才見稱於世故並用之也

葛勝仲

按宋史本傳勝仲字魯卿丹陽人登紹聖四年進士第調杭州司理叅軍林希薦試學官及詞科俱第一除兗州教授入爲太學正上幸學多獻頌者勝仲獨獻賦上命中書第其優劣勝仲爲首差提舉議曆所檢討官兼宗正丞始朝廷以從臣提舉議曆所至是代以郭天信勝仲力請罷之稍遷禮

部員外郎會御史中丞石公弼言僖祖原廟增置殿室違元豐之舊詔禮官議勝仲建言予而復奪在常人猶難之況在天之靈乎議者非之責知歙州休寧縣復召爲禮部員外郎權國子司業時朝廷命諸生習雅樂樂成進一官遷太常卿宋自建隆至治平所行典禮歐陽修嘗裒集爲書凡百篇號太常因革禮詔勝仲續之增爲三百卷詔藏太常及建春宮以勝仲兼諭德勝仲爲仁孝學三論獻之太子復採春秋戰國以來歷代太子善惡成敗之迹日進數事詔嘉之徙太常少卿除國子祭酒尋知汝州李彥括田破產者衆勝仲請蠲不當括者彥怒劾勝仲上寢其奏改湖州尋徙鄧州朱勔先求白雀之屬勝仲不與至是媒孽其短罷歸建炎中范宗尹爲相凡前日以朋附被罪遠貶者咸赦還復知湖州時羣盜縱橫聲搖諸郡勝仲修城郭作戰艦閱士卒賊知有備引去歲大饑發官廩振之民賴以濟紹興元年丐祠歸十四年卒年七十三諡文康子立方官至侍從孫邨爲右相自有傳

沈晦

按宋史本傳晦字元用錢塘人翰林學士沈遘孫宣和間進士廷對第一除校書郎遷著作佐郎金

人攻汴京借給事中從肅王樞出質幹離不軍金人再攻也與之俱南京城陷邦昌僞立請金人歸馮澥等晦因得還眞爲給事中高宗卽位言者論晦雖使金艱苦而封駁之職不可以賞勞除集英殿修撰知信州帝如揚州將召爲中書舍人侍御史張守論晦爲布衣時事帝曰頃在金營見其慷慨士人細行豈足爲終身累耶不果召知明州移處州帝如會稽移守婺州賊成皐入寇晦用教授孫邦策率民兵數百出城與戰大敗晦欲斬邦策已而釋之時浙東防遏使傅崧卿在城中單騎往說皐皐遂降進徽猷閣待制以言者論晦妄用便宜指揮行事降集英殿修撰提舉臨安府洞霄宮尋復徽猷閣待制知宣州移知建康府甫踰月以御史常同論罷紹興四年起知鎮江府兩浙西路安撫使過行在面對言藩帥之兵可用今沿江千餘里若令鎮江建康太平池鄂五郡各有兵一二萬以本郡財賦易官田給之敵至五郡以舟師守江步兵守隘彼難自渡假使能渡五郡合擊敵雖善戰不能一日破諸城也若圍五郡則兵分勢弱或以偏師綴我大軍南侵則五郡尾而邀之敵安敢遠去此制稍定三年後移江北糧餉器械悉自隨又自乞分兵二千及召募敢戰士三千參用昭義步兵法期年後京口便成疆藩時方以韓世忠屯軍鎮江不果用劉麟入寇世忠拒於揚州晦乞

促張俊兵爲世忠援趙鼎稱晦議論激昂帝曰晦誠可嘉然朕知其人言甚壯膽志頗怯更觀臨事能副所言與否然晦不爲世忠所樂尋提舉臨安府洞霄宮起爲廣西經略兼知靜江府先是南州蠻酋莫公晟歸朝歲久用爲本路鈐轄羈縻之後遁去旁結諸峒蠻歲出爲邊患晦選諸將羅統戍邊招誘諸酋喻以威信皆詣府請降晦犒遺之結誓而去自是公晟孤立不復犯邊晦在郡歲買馬三千匹繼者皆不能及進徽猷閣直學士召赴行在除知衢州改潭州提舉太平興國宮卒晦膽氣過人不能盡循法度貧時尤甚故累致人言然其當官才具亦不可掩云

衛膚敏

按宋史本傳膚敏字商彥華亭人以上舍生登宣和元年進士第授文林郎南京國子博士尋改教授六年召對改宣教郎祕書省校書郎命假給事中賀金主生辰膚敏奏曰彼生辰後天寧節五日金人未聞入賀而反先之以失國體萬一金使不來爲朝廷羞請至燕山候之彼若不來則以幣置境上而已帝可其奏既至燕金賀使果不至遂置幣而返七年復假給事中以行及慶源府逢許亢宗還語金國事曰彼且大入其勢不可往膚敏至燕報愈急衆懼不敢進膚敏叱曰吾將君命以行

其可止乎既至金國知其兵已舉殊不爲屈及將還金人所答國書欲以押字代璽虜敏力爭曰押字豈所以交鄰國論難往復卒易以璽及受書欲令雙跪虜敏曰雙跪乃北朝禮安可令南朝人行之哉爭辯踰時卒單跪以受金人積不說中道羈留且半年至涿州新城與幹離不遇遣人約相見拒之不可遂語之曰必欲相見其禮當如何曰有例虜敏笑曰例謂趨伏羅拜此禮焉可用北朝止一君耳皇子耶君雖貴人臣也一介之使雖賤亦人臣也兩國之臣相見而用君臣之禮是北朝一國有二君也金人氣折始曰唯所欲虜敏長揖而入既坐金人出誓書示之虜敏却不視曰遠使久不聞朝廷事此書真僞不可知因論用兵事又以語折之幾復爲所留靖康初始還進三官遷吏部員外郎會高麗遣使來賀命假太常少卿往接之朝論欲改稱宣問使虜敏曰國家厚遇高麗久矣今邊事方作不可遽削其禮失遠人心願姑仍舊乃復稱接伴使既至明州會京師多難乃便宜稱詔厚賜使者遣還建炎元年復命自劾矯制之罪高宗嘉賞遷衛尉少卿建議兩河諸郡宜降蠟書許以世襲使各堅守陝西山東淮南諸路並令增陴浚隍徙民入城爲清野計命大臣留守汴京車駕早幸江寧帝頗納之遷起居舍人言前日金人憑陵都邑失守朝臣欲存趙氏者不過一二人而